



CLARISSIMO VIRO D.  
FRANCISCO JOSEPHO HUNAUD,  
SALUBERRIMÆ FACULTATIS MEDICÆ PARISIENSIS  
DOCTORI REGENTI,  
REGIÆ SCIENTIARUM ACADEMIÆ SOCIETATISQUE REGIÆ  
LONDINENSIS SOCIO,  
IN HORTO REGIO ANATOMES ET CHIRURGIAE  
PROFESSORI,

Eternum grati animi monumentum D. V.  
AUGUSTINUS FRANCISCUS JAULT.


## QUÆSTIO MEDICA.

*Quodlibetariis agitanda Disputationibus in Antonianis Medicorum Remensis  
Scholis, die Lunæ 13. Decembris, hora octava matutina.*

Clarissimo Viro GERARDO LEFILZ, Præfide

*An ossa humani capitis temporalia Anteridum vicem obeant?*

1.

 QUANTUM cæteras corporis partes cerebrum dignitate antecellat, norunt vel in Anaromiâ peregrini. Regiam mentis non male dixeris, ex quâ machinâ totius habenas moderatur, sine quâ mens nec imaginatur, nec reminiscitur, neque etiam intelligit. Cerebro nervi motuum ac sensationum ministri originem debent, eo læso vel abolentur penitus, vel depravantur nobilissimæ functiones, contingunt apoplexiæ, hemiplegiæ, paralytes, comata, deliria, epilepsiæ, aliæque gravissimorum morborum iliades. Sed quàm præstans ac necessaria, tam mollis ac tenera

cerebri substantia : Quantum autem in eo fingendo, tantum in eo mun-  
niendo eluxit supremi numinis industria.

## II.

**P**RÆTER communia toti corpori integumenta, quibus ab externis defenditur injuriis, clausum est cerebrum osseo involucrio, quod cum primis foetus in utero contenti mensibus nihil aliud nisi membrana sit, paulatim limphae nutrientis ope in marmoream quasi duritiem concrevit. Quid mirum? cum & lapides & metalla ipsa à succo eorum vascula subeunte soliditatem & incrementum habeant. Cranium autem humanum, vel ut solidius esset, vel ut facilius cresceret, ex multis & variis ossibus, variisque ossium compaginibus, quæ futuræ dicuntur apud Anatomicos, conflatum est. Earum duæ observantur species. Aliæ vocantur dentatæ, quando ossa serræ instar incisa dentibus invicem insertis conjunguntur. Talis ossium parietalium inter se, cum osse coronali & occipitali connexio. Aliæ futuræ squamosæ audiunt, in quibus ossa ad squamarum normam ita cohererent, ut margo unus marginem subeat alterius. Hoc pacto temporalia cum parietalibus coagmentantur, sed ita ut ora temporalium squamosa parietalium oram exterius obtegat. Hujusmodi positionis rationem multi investigavere. Primus, ut alia bene multa, sagaci ingenio expiscatus est celeberrimus D. Hunaud; cujus vestigia legentes sic rem paucis enucleamus.

## III.

**C**ORRUERE fornix nequit nisi deficiant ac dimoveantur fulcra ipsum sustentantia, quæ à Græcis & Latinis *Anterides* dicta sunt, sive arcus sive muri apppositi formam habeant. Ideirco in hoc potissimum laborant artifices, ut Anteridibus firmitatem concilient: non nescii, si illæ inconcussæ maneat, inconcussum quoque futurum esse fornitem foreque ut illum gravissima pondera nedum evertant, stabiliant potius, lapidumque nexus intimiores reddant; fatiscantibus contra Anteridibus, labefactatum iri fornitem, architectique imperitiam proditurum. Fornix est cranium; Anterides itaque necessario requirit, alioquin levi ictu aut pondere depressum, infinitas in cerebro turbas concitaret, totamque humani corporis oeconomiam brevi destrueret. Frustrà mutuis dentibus coherens ossa parietalia tam inter se quam cum ossibus coronali & occipitali; frustrà tabula interior angustioribus quàm exterior est circumscripta limitibus; frustrà tabulæ internæ dentes, tabulæ internæ oppositæ fines invicem transiliunt, ejusque limbo innixi Diploes substantiam penetraunt; nisi pars ossium parietalium inferior, Anteridis auxilio adeo stabilietur ut exterius propelli nullâ ratione possit. Quod si ossa temporalia cum parietalibus dentata futura conduceret, latera quidem capitis à compressione

exterius admotâ, vel ab ictu defenderet; sed parietalium inferior pars gravi pondere vertici imposito vidâ, aut violento ictu eidem parti illato quassata, sedibus necessariò dimoveretur suis, & exterius propulsa os temporale defereret; dum interea eorundem ossium pars superior depressa, interiorque protrusa funestam cerebro labem inferret, & quod ab externis injuriis tutari debuera, pessimè ipsa multaret.

## IV.

**S**ED istas calamitates egregiè arcant ossa temporalia: horum etenim pars superior parti inferiori parietalium squamæ instar superjecta, ultima hæc in loco retinet, stabilis, firmat, ut nec deprimi ex parte supernâ, nec projici exterius ex parte infimâ possint. Hinc ossa parietalia tantis ponderibus innoxie sustinendis paria sunt. Hinc juvenculas mulieres spectamus, cum gravissimis oneribus capiti impositis, non solum absque incommodo, sed etiam alacriter agros & oppida perambulant. Diceret ex onere vires augeri. Quod majori vi fulciunt ossa temporalia, cò levius ingestorum ponderum mole gravatur futura sagittalis; cujus quidem interni dentes cum tabulæ internæ quæ tenuissima est mutuò innitantur, sintque ipsimet cæteris ossium partibus longe tenuiores; quàm sit utilis, squamosæ futuræ dispositio, quàm firmiter in loco partem ossium parietalium/inferiorem detineri necessum sit, facile patet. Ossa itaque temporalia cā quâ pollent vi longè maximam sustinentorum onerum laudem meritò sibi vindicant. Hoc debent illis parietalia, quod integra, quod inconvulsa resistant. Quis igitur non clare perspicit cur pars temporalium squamosa, partem squamosam parietalium externè tegat, ista verò sub alterâ posita recondatur? Cæterum eandem quam temporalia prærogativam obtinet os sphenoides: quippe ejus pars squamosa, anteriori & inferiori parietalis utriusque angulo eodem prorsus artificio coadunatur, firmandisque parietalibus symbolam confert.

## V.

**V**ERUM ut ossa temporalia antè idum vice fungantur, ea necesse est in statione suâ fixa & immota perstare; quod quidem ita se habere cognoscet, si compactum & coagmentatum cranium dissolvas: sublati enim parietalibus, temporalia cum occipitali & sphenoidè tam arcte implicata atque coherentia reperies, ut eorum stabilitatem mirari desinas. Sed quid obstat quominus pars ossium parietalium infimâ ictu violento convulsa cedat atque intrò pellatur, accipe. Limbum coronalis superiorem ut plurimum parietalia sustentant; verum in lateribus interior coronalis tabula exteriorem longitudine multum superans, prominentem pariter ossis parietalis exteriorem tabulam excipit ac sustinet, impeditque ne ictu

4

vim in interiorem partem faciente, & sede deficiatur. Hanc autem adhibere cautionem non satis esse visum est. In supernâ ossis temporalis margine, petrosam inter & squamosam ipsius partem, incisura quædam apparet, cui insertus limbus parietalis inferior, immotus permanet, neque intus vel e tûs potest evagari. Vides igitur, quæcunque ad stabiliscendum fornicem à solertissimo ingenio inveniri queunt, ea, multaque alia humanam excogitationem longè superantia, ad firmandum hominis cranium adhibita fuisse.

*Ergo ossa humani capitis temporalia Anteridum vicem obeunt.*

### DOMINI DOCTORES DISPUTATURI.

M. GERARDUS LEFILZ, *Antiquior Scholarum Magister  
Professor Antonianus, Consiliarius Medicus Regis & Decanus, Præses.*

M. SIMON HEDOUIN, *Generalis Universitatis Quæstor  
& Professor Antonianus.*

M. HENRICUS-JOSEPHUS BERNARD, *Professor  
Scholarum.*

M. PETRUS JOSNET, *Professor Antonianus.*

Proponebat Remis AUGUSTINUS FRANCISCUS JAULT  
Sequanus, *Artium Magister & Medicinæ Baccalaureus,*  
A.R.S.H. M.DCC. XXXIV.

---

Ex Typis N. PIERARD, Facultatis Medicinæ Typographi.